

MINISTERIU JUSTISA TIMOR-LESTE

**ESTRUTURA ORGÁNICA DIRESAUN NASIONAL DOS SERVISUS PRISIONAIS NO
REINERSAUN SOSIAL**

DIPLOMA MINISTERIÁL Nº 05/2013

Estrutura Orgánika Direcção Nacional dos Serviços Prisionais e de Reinserção Social nian Ministério da Justiça nia lei orgánika foun, ne'ebé Dekretu-Lei nº 2/2013 aprova iha 6 Marsu, prevee iha ninia artigo 14º atribuisaun ne'ebé Direcção Nacional dos Serviços Prisionais e de Reinserção Social tenke la'ó tuir, bainhira nu'udar servisu responsavel ba definisaun, jestaun no seguransa sistema prizonál no servisu reinsertaun sosiál, ne'ebé ninia misaun prinsipál maka hametin mekanizmu adekuaudu atu hetan sistema prizonál ida ne'ebé umanu, justu no seguru.

Ho estrutura foun ida-ne'e, hanoin atu garante jestaun no seguransa sistema prizonál nian buras tomak no haree loos ba reinsertaun sosiál no individualizasaun ba akompañamentu individu, ema-kondenadu no ema-preventivu tanba desizaun penál ida no, ho nune'e, sira tama iha Ministério da Justiça nia responsabilidade.

Nune'e,

Governu haruka liuhosi Ministru Justisa, tuir dispostu artigo 24º hosi DL nº 2/2013, 6 Marsu, atu publika diploma tuirmai:

KAPÍTULU I

NATUREZA, MISAUN NO ATRIBUISAUN

Artigo 1º

Natureza

Direcção Nacional dos Serviços Prisionais e de Reinserção Social, ne'ebé habadak ba DNSPRS, nu'udar servisu administrasaun direta Estadu nian ne'ebé responsabiliza ba definisaun, jestaun no seguransa ba sistema prizonál no servisu reinsertaun sosiál.

Artigo 2º

Misaun

1. DNSPRS nia misaun maka haburas polítika ezekusaun pena no medida, reinsertaun sosiál no jestaun sistema prizonál nian hodi hametin kondisaun hirak ne'ebé kona-di'ak ho dignidade umana no direitu fundamentál ema-dadur nian nomós kontribui ba defeza orden no pás sosiál.

2. Kona-ba ninia misaun, DNSPRS iha objetivu atu:

a) Garante sistema prizonál sai nu'udar fatin atu promove seguransa iha sosiedade nia leet, respeita dignidade no direitu umanu ema-dadur nian;

b) Hametin garantia atu sira-ne'ebé hasoru konfliktu ho lei, ema-kondenada ka ema-preventiva, ne'ebé iha hela servisu prizaun nia responsabilidade, hetan dalan ba direitu báziku hodi hala'ó ezersísiu sidania nian;

c) Hamenus vulnerabilidade no hala'ó individualizasaun pena no reinsertaun sosiál tuir sistema prizonál.

Artigu 3º

Atribuisaun

DNSPRS la'o-tuir atribuisaun hirak tuirmai:

a) Garante organizasaun no funsionamentu sistema prizonál no reinsertaun sosiál, ho dalan hametin jestaun no seguransa iha estabelesimentu prizonál;

b) Dirije, organiza no orienta funsionamentu servisu prizaun kona-ba ezekusaun pena no medida privativa ba liberdade iha estabelesimentu prizonál no sentru juvenil;

c) Dirije, organiza no orienta funsionamentu servisu hodi fó kuidadu ba saúde isin no mentál ema-dadur inimpotável-kondenadu nian tuir medida seguransa internamentu;

d) Orienta formasaun edukasionál no profesionál ba ema-dadur, liuliu ema-dadur joven;

e) Promove desenvolvimentu ba atividade ekonómika produtiva no traballu ema-dadur nian, iha estabelesimentu prizonál no sentru juvenil;

f) Elabora, organiza no ezekuta programa hirak ne'ebé haree ba individualizasaun pena no medida privative ba liberdade no ema-dadur nia reinsertaun sosiál;

g) Promove kondisaun moris ne'ebé ho dignidade no umanu, iha estabelesimentu prizonál no sentru juvenil;

h) Promove, dezenvolve no koordena programa akompañamentu ne'ebé kona-loos ho perfil kriminolójiku no psicolójiku no ba presiza reinsertaun sosiál ema-dadur nian;

i) Elabora, ezekuta no avalia planu individuál ba akompañamentu no reinsertaun sosiál tuir sistema prizonál;

j) Promove reinsertaun sosiál ba ema-dadur no ema-dadur joven hodi hametin ligasaun rasik ho família, sosiál no profesionál;

k) Fó-tulun hodi prepara lisensa-saída, liberdade kondisionál no liberdade ba prova nomós halo akompañamentu ba kondenadu bainhira ezekuta lisensa ne'e rasik, hodi lori ninia reinsertaun sosiál liuhosi mekanizmu ho dalan sosiál, edukativa no laborál;

l) Fó asesoria téknika ba tribunál, liuliu elabora relatóriu no planu individuál hodi fó liberdade kondisionál, instrusaun prosesu indultu no medida flesibilizasaun pena nian;

m) Promove akompañamentu ba ezekusaun pena no medida la privativa ba liberdade, hodi aplika iha comunidade, liuliu pena hodi hala'ó servisu ba comunidade nia dí'ak no pena prizaun suspensa;

n) Organiza no atualiza nafatin prosesu individuál no fiseiru hirak kona-ba prezu-kondenadu, ema-preventivu no ema-inimpotável ne'ebé kumpre medida seguransa;

o) Fahe ema-dadur sira ba estabelesimentu prizonál no ema-dadur joven ba sentru juvenil;

- p) Elabora planu seguransa jerál no spesífiku ba instalasaun prizionál no sentru juvenil no hametin ninia ezekusaun;
- q) Hala’o kolaborasaun hodi haree-tutuir no avalia polítika públika ba sistema prizionál no reinsersaun sosiál;
- r) Halo programa kona-ba presiza instalasaun no ekipamentu prizionál nian;
- s) Koordena no orienta formasaun profesionál guarda-prizionál nian, tékniku reinsersaun sosiál no kuadru administrativu;
- t) Kolabora, tuir ninia kompeténsia, ho ajente hirak seluk tan servisu Justisa nian no entidade relevante seluk.

KAPÍTULU II

ESTRUTURA ORGÁNICA

SEKSAUN I

ESTRUTURA, DIRESAUN NO XEFIA

Artigu 4º

Estrutura orgánika

1. DNSPRS iha servisu sentrál no unidade orgánika descentralizada, ne’ebé harii liuhosi estabelesimentu prizionál no sentru juvenil;
2. DNSPRS nia servisu sentrál maka:
 - a) Departamentu Seguransa no Ezekusaun Penál;
 - b) Departamentu Reinsersaun Sosiál no Observasaun Kriminológjika;

- c) Departamentu Inspesaun no Auditoria;
- d) Departamentu Estudu no Formasaun Penitensiária;
- e) Departamentu Administrasaun.

3. Bele harii seksaun hanesan subunidade orgánika departamentu nian, bainhira de’it iha volume traballu ka kompleksidade ida hatebes, ho mínimu traballadór na’in-sanulu no hetan supervizaun hosi Xefe Seksaun ida, tuir termu Lei nian.

Artigu 5º

Estabelesimentu prizionál

1. Estabelesimentu prizionál nu’udar unidade orgánika ne’ebé funciona, ho dependénsia ba Ministério da Justiça, hodi hala’o ezekusaun pena no medida privativa ba liberdade ne’ebé aplika tanba desizaun penál.
2. Diploma ministériál hosi Ministru Justisa maka hamoris no klasifika estabelesimentu prizionál.
3. Estabelesimentu prizionál hetan klasifikasaun tuir funsaun nivel seguransa nian, iha estabelesimentu ba seguransa alta, média no baixa, bele harii unidade no seksaun ka ala ho nivel seguransa la hanesan.
4. Estrutura orgánika, rejime funcionamentu no kompeténsia órgaun nian no servisu hirak ne’ebé hala’o iha Estabelesimentu Prizionál defini iha Regulamentu Jerál Estabelesimentu Prizionál nian, tuir lei.

Artigu 6º

Sentru Juvenil

1. Sentru juvenil nu'udar unidade orgánika ne'ebé funsiona, ho dependénsia ba Ministério da Justiça, no destina ba ezekusaun pena no medida privativa ba liberdade ne'ebé aplika ba joven ho idade hale'u 16 no 21, hodi hamenus vulnerabilidade no ninia reinsersaun sosiál.
2. Diploma ministériál hosi Ministeru Justisa maka hamoris sentru juvenil.
3. Sentru Juvenil bele harii liuhosi unidade autónoma ka integra seksaun espesiál ho dependénsia ba estabelesimentu prizionál, ne'ebé ba kazu sasá de'it, koordinadór ida maka dirije hodi hametin jestaun ekipa ida nian no programa lubun ida be kona liuliu ba emadadur joven, tuir lei.

Artigu 7º

Diresaun no Xefia

1. Diretór Nasionál ida maka dirije DNSPRS, ne'ebé hetan nomeasaun hosi Ministru Justisa no nia subordina direta ba ministru.
2. Iha departamentu ida-idak, Xefe Departamentu ida maka lidera ho subordinasaun ba Diretór Nasionál.
3. Iha seksaun ida-idak, Xefe Seksaun ida maka lidera ho subordinasaun ba Xefe Departamentu.

4. Diretór ida maka lidera Estabelesimentu Prizionál ka Sentru Juvenil ida-idak, ne'ebé hala'ó knaar hamutuk ho Xefe Departamentu no nia subordina ba Diretór Nasionál.

5. Kargu Diretór Nasionál, Xefe Departamentu, Xefe Seksaun no Diretór Estabelesimentu Prizionál no Sentru Juvenil maihosi hahilik tuir preferénsia ba funcionáriu sira hosi karreira rejime jerál ne'ebé ho méritu no esperiénsia ba área direitu ka hetan kualifikasaun relevante hosi área ne'ebé temi tiha, liuhosi despaxu Ministru Justisa nian, ho komisaun servisu, tuir lejizlasaun ne'ebé vigora hela.

6. Diretór Nasionál bele apresenta Xefe Departamentu ba Ministru Justisa atu troka nia bainhira la tama servisu ka hetan impedimentu.

Artigu 8º

Diretór Nasionál nia kompeténsia

Diretór Nasionál DNSPRS iha kbiit atu:

- a) Superintende servisu, koordena no dirije atividade DNSPRS nian, haktuir orientasaun ne'ebé superior defini no hametin koordenaun traballu diresaun ida-ne'e nian ho Diresaun Nasionál hirak seluk tan;
- b) Aprova instrusaun no regulamentu ne'ebé presiza ba funcionamentu Departamentu nian;
- c) Fahe no tau-matan ba jestaun funcionáriu servisu prizaun nian;
- d) Hato'ó ba Ministru Justisa harii, taka ka halakon estabelesimentu prizionál ka sentru juvenil;

- e) Promove individualizasaun ezelesaun penál no programa reinsertaun sosiál ba ema-dadur ne'ebé kumpre hela pena ka medida privativa ba liberdade;
- f) Superviziona no akompaña dezempeñu estabesimentu prizionál no sentru juvenil hodi kumpre atividade administrativa no ezelesaun penál;
- g) Promove asaun hodi fó informasaun no relasaun públika ba funsionáriu servisu prizaun nian no ba ema hotu-hotu;
- h) Representa DNSPRS hamutuk ho Diresaun Nasionál hirak seluk tan no organizmu ne'ebé hamriik iha Ministério da Justiça nia mahon;
- i) Apresenta programa atividade nian ba Ministru Justisa, tuir medida no política lejizlativa ne'ebé Ministériu adopta, ba área servisu prizaun no reinsertaun sosiál;
- j) Apresenta relatóriu periódiku atividade DNSPRS nian ba Ministru Justisa;
- k) Hato'ó ba Ministru Justisa harii seksaun, bainhira departamentu, estabesimentu prizionál ka sentru juvenile hasoru traballu ho volume ka kompleksidade ida hatebes;
- l) Fó servisu ba funsionáriu ne'ebé nu'udar parte hosi DNSPRS no ekipa traballu ne'ebé sei harii;
- m) Apresenta ba Ministru Justisa planu no programa atu hasa'e funsionáriu DNSPRS nia kapasidade no valorizasaun profesionál;

n) Determina halo inspesaun, auditoria no sindikánsia ba servisu DNSPRS no estabesimentu prizionál no sentru juvenil;

o) Hala'ó jestaun no orientasaun téknika ba pesoál guarda-prizionál;

p) Aprova projetu ne'ebé halo liuhosi parseria ho organizaun nasional ka internasionál ne'ebé fó interese ba DNSPRS, hodi la'otuir Ministru Justisa nia autorizasaun;

q) Fó-sai orientasaun téknika kona-ba atividade operativa, instrusaun ho karáker jenériku kona-ba funsionamentu servisu nian no aprova regulamentu internu ne'ebé temi iha lei;

r) Ezerse tan kompeténsia hirak ne'ebé lei fó ka Ministru Justisa delega.

Artigu 9º

Xefe Departamentu

Xefe Departamentu nia kbiit maka:

a) Hametin dezempeñu atribuisaun ne'ebé fó ba Departamentu;

b) Superviziona funsionáriu Departamentu nia atividade;

c) Elabora Diresaun Nasionál nia planu asaun ho tulun-lisuk hosi Xefe Departamentu sira seluk no Diretór Nasionál;

d) Apresenta relatóriu periódiku kona-ba atividade Departamentu nian ba Diretór Nasionál;

e) Ezerse tan kompeténsia hirak ne'ebé lei fó ba nia ka Diretór Nasionál delega.

SEKSAUN II
SERVISU SENTRÁL

Artigu 10º

Departamentu Seguransa no Ezekusaun Penál

1. Departamentu Seguransa no Ezekusaun Penál nu'udar servisu sentrá, operasionál no responsavel ba elaborasaun, koordinasaun no supervizaun ba modelu seguransa ne'ebé sei adopta iha instalasaun prizaun, atividade eskolta no kustódia, hanesan mós tratamentu ba informasaun no funsionamentu estabelesimentu prizionál no sentru juvenil nian.

2. Departamentu Seguransa no Ezekusaun Penál iha kbiit atu:

a) Halo modelu seguransa ne'ebé sei adopta iha instalasaun prizaun;

b) Elabora planu seguransa spesífiku ba Estabelesimentu Prizionál no Sentru Juvenil ida-idak, hanesan mós ba ninia unidade autónoma, no fiskaliza planu nia aplikasaun;

c) Elabora no apresenta planu emerjénsia nasional atu sistema prizionál foti asaun iha situasaun krize, hodi garante orden no seguransa iha sistema prizaun;

d) Apresenta medida ne'ebé presiza atu fó garantia ba orden no seguransa servisu prizaun nian, iha situasaun emerjénsia;

e) Halibur no haree didi'ak informasaun ne'ebé presiza hodi halo manutensaun ba orden no seguransa iha instalasaun prizaun no hametin garantia ba kustódiu ema-dadur ne'ebé haktuir dilijésia esterna, ka bainhira iha transporte nia laran no transferénsia;

f) Promove pesoál korpu guarda-prizionál nia afektasaun no transferénsia ba estabelesimentu prizionál no sentru juvenil;

g) Halo no hatada modelu eskala traballu nian iha estabelesimentu prizionál no sentru juvenil ba pesoál korpu guarda-prizionál, haktuir kritériu no regra ne'ebé Diretór Nasionál aprova tiha;

h) Fahe materiál defeza no seguransa nian ne'ebé presiza ba estabelesimentu prizionál no sentru juvenil, garante hodi tau-matan no halo manutensaun, organiza no rai iha inventáriu rasik;

i) Asegura fó eskolta ba ema-dadur, liuhosi dalan rasik ka hamutuk ho forsa seguransa;

j) Promove ka adopta rasik ka ho artikulasaun ho servisu seluk ka forsa seguransa prosedimentu ba seguransa adekuada hodi garante kustódia ba ema-dadur ne'ebé hetan transferénsia;

k) Hatada no koordena aplikasaun norma, prosedimentu no regra atu observa iha estabelesimentu prizionál no sentru juvenil kona-ba seguransa, orden no dixiplina;

l) Apresenta tipu no modelu materiál defeza no seguransa nian hodi uza iha servisu prizaun, hanesan mós haree-metin didi'ak ema-dadur nia kapasidade iha instalasaun prizaun ida-idak;

m) Koordena asaun hodi halo intervensaun no seguransa prizionál iha emerjénsia nia laran;

n) Fó-sai informasaun ka paresér kona-ba seguransa prizaun nian, bainhira husu;

o) Tulun Diretór Nasionál hodi halo desizaun ba ema-dadur nia afektasaun;

p) Organiza ema-dadur nia afektasaun no transferénsia, haktuir ninia perfil no situasaun jurídika, iha estabesimentu prizonál no sentru juvenil;

q) Ezerse tan kompeténsia hirak ne'ebé lei fó ka Diretór Nasionál delega;

Artigu 11º

Departamentu Reinsersaun Sosiál no Observasaun Kriminolójika

1. Departamentu Reinsersaun Sosiál no Observasaun Kriminolójika nu'udar servisu sentrá, operasionál no responsavel ba koordinasaun téknika promosaun nian no jestaun atividade no programa reinsersaun sosiál, liuliu kona-ba ensinu, formasaun profisionál, traballu, atividade okupasionál, sosiokulturál no desportu, fó kuidadu ba saúde isin no mentál no akompañamentu psikososiál;

2. Departamentu Reinsersaun Sosiál no Observasaun Kriminolójiku iha kbiit atu:

a) Promove formasaun no hakle'an kbiit profisionál ema-dadur nian, liuliu liuhosi koordinasaun estreita ho servisu públiku nasional ne'ebé responsabiliza edukasaun no ensinu no entidade pública no privada hirak seluk ho kompeténsia ba área ida ne'e;

b) Dezenvolve programa alfabetizasaun no edukasaun primária, sekundária no kontínua ba ema-dadur, liuhosi tulun-lisuk ho

entidade pública no privada ne'ebé iha kompeténsia ba área ida ne'e;

c) Promove atividade kulturál, desportiva no rekreativa ho ema-dadur no ninia família;

d) Hato'o atu harii ekipa traballu ne'ebé forma hosi ema-dadur no kolabora ho dirigente estabesimentu prizonál no sentru juvenil hirak seluk kona-ba rekrutamentu no akompañamentu ba sira ne'ebé integra iha ekipa;

e) Organiza, ezejuta no haree-tutuir prosesu individualizasaun pena nian no programa reinsersaun sosiál ho ema-dadur bainhira kumpre hela pena;

f) Harii parseria ho entidade pública no privada ne'ebé iha relasaun ho reinsersaun sosiál hosi ema ne'ebé hetan kondensasaun ba medida privativa ba liberdade ka pena ka medida alternativa ne'ebé presiza akompañamentu profisionál;

g) Promove dezvoltamentu ba programa hirak ne'ebé iha relasaun ho ezejusaun medida alternativa ba pena prizaun;

h) Akompaña prosesu ne'ebé la'o hela iha tribunál no fó assisténsia nomós informasaun jurídika ba ema-dadur no nia família kona-ba ninia kondensasaun;

i) Fó informasaun no apoiu tékniku ba tribunál no entidade seluk ho legitimidade jurídika, luihosi informasaun, relatóriu no paresér kona-ba ema-dadur, bainhira husu, liuliu prosesu fó lisensa no akompañamentu liberdade kondisionál, liberdade ba prova, nomós instrusaun prosesu indultu ne'ebé entidade competente husu;

j) Define liña-orientasaun ba servisu espesializadu estabesimentu prizionál nian no sentru juvenil, hodi hatán ba prezisa fó akompañamentu no individualizasaun pena;

k) Implementa no hametin programa apoiu psikososiál ida ba ema-dadur no ninia família;

l) Hala'ó avalisaun no akompañamentu psikolójiku no psikiátriku ba ema-dadur ne'ebé prezisa kuidadu hirak-ne'e;

m) Estabele akordu ho estrutura área saúde seluk ho rohan hametin servisu ba ema-dadur;

n) Hato'ó hodi adopta medida hirak ne'ebé kona loos atu hadi'ak liután servisu saúde no kondisaun ijiénikusanitária estabesimentu prizionál nian no sentru juvenil, hanesan mós haburas medida rastreiu no prevensaun moras infekto-kontajioza ba ema-dadur;

o) Fó asesoria ba direktór estabesimentu prizionál no sentru juvenil bainhira halo avaliasaun no akompañamentu ba ema-dadur ne'ebé kondena tiha ba situasaun saída esterna ka hetan liberdade kondisionál no liberdade ba prova, tuir lei;

p) Akompañã no avalia ema-kondenadu ne'ebé kumpre pena no medida la privativa ba liberdade, tuir lei;

q) Promove no kolabora liuhosi asaun formasaun no afektualizasaun tékniku-sientífiku ba funsionáriu ne'ebé hala'ó knaar iha departamentu;

r) Dezenvolve peskiza no monotorizasaun ba asuntu hirak ne'ebé kona kriminalidade, perfil ema-dadur no reinsersaun sosiál;

s) Atualiza hela de'it baze-dadus ho informasaun ne'ebé prezisa ba programa reinsersaun;

t) Ezerse tan kompeténsia hirak ne'ebé lei fó ka Direktór Nasionál delega;

Artigu 12º

Departamentu Inspesaun no Auditoria

1. Departamentu Inspesaun no Auditoria nu'udar servisu sentrál, operasionál no responsavel ba inspesaun, fiskalizasaun no auditoria ba unidade orgánika descentralizada no servisu sentrál DNSPRS nian, hodi hametin verifikasaun legalidade nian, manutensaun orden no dixiplina sistema ezekusaun penál;

2. Departamentu Inspesaun no Auditoria iha kbiit atu:

a) Superviziona, akompañã no avalia dezempeñu estabesimentu prizionál no sentru juvenil, liuliu kona-ba ezekusaun pena no jestaun, hodi haree ninia efisiénsia, artikulasaun no aperfeisoamentu;

b) Hatebes kumpre dispozisaun legál, regulamentu no instrusaun servisu nian, iha estabesimentu prizionál no sentru juvenil;

c) Avalia efisiénsia hosi jestaun unidade orgánika descentralizada;

d) Identifika medida-korresaun hosi prosedimentu ne'ebé hatudu la adekuadu no hatada hodi adopta norma, métodu no tékniku atubele hadi'ak liutan servisu no halo prosedimentu la'ó ho oin hanesan;

e) Instaura prosedimentu dixiplinár ka inkéritu, realiza inspesaun, auditoria no sindikánsia rasik ka ho tulun-lisuk hosi Gabinete Inspesaun no Auditoria Ministério da Justiça nian;

f) Fó-sai informasaun ka paresér, bainhira husu;

g) Ezerse tan kompeténsia hirak ne'ebé lei fó ka Diretór Nasionál delega.

Artigu 13º

Departamentu Estudu no Formasaun Penitensiária

1. Departamentu Estudu no Formasaun Penitensiária nu'udar servisu sentrá, operasionál no responsavel ba formasaun pesoál hotu-hotu servisu prizaun nian, ne'ebé simu kbiit atu prepara no lori-la'ó modelu rekrutamentu no selesaun ba DNSPRS nia pesoál.

2. Departamentu Estudu no Formasaun Penitensiária iha kbiit atu:

a) Apresenta no ezejuta planu anuál formasaun nian iha servisu prizaun;

b) Hala'ó estudu, hatada medida no define norma no téknika atuasaun tuir ninia objetivu;

c) Promove asaun ne'ebé presiza ba rekursu umanu nia aproveitamentu no dezvoltamentu no materiál hirak ne'ebé kona servisu, hodi haree ho realizasaun objetivu ne'ebé hamosu rezultadu di'ak;

d) Promove asaun rekrutamentu no selesaun pesoál nian, hanesan mós fó apoiu tékniku ba asaun hirak ne'ebé la tenke realiza tuir ninia ámbitu;

e) Prepara no jere kursu formasaun, formasaun espesializada no aperfeisoamentu ba pesoál DNSPRS;

f) Fó kolaborasaun hodi prepara modelu rekrutamentu no selesaun pesoál nian;

g) Organiza estájui no vizita estudu ba pesoál DNSPRS iha rai-laran ka rai-li'ur;

h) Realiza asaun ne'ebé kona informasaun no relasaun públika ba funsionáriu servisu prizaun no ema hotu-hotu;

i) Organiza DNSPRS nia biblioteka;

j) Promove konferénsia, kolókiu no inisitiava hirak seluk ne'ebé besik hanesan;

k) Ezerse tan kompeténsia hirak ne'ebé lei fó ka Diretór Nasionál delega;

Artigu 14º

Departamentu Administrasaun

1. Departamentu Administrasaun nu'udar servisu sentrá, la operasionál, responsavel ba administrasaun no jestaun rekursu umanu, meteriál, finanseiru, lojístiku no informátiku iha DNSPRS.

2. Departamentu Administrasaun iha bkiit atu:

- a) Organiza espediente hotu-hotu sekretaria nian, hodi hametin resepsaun, rejistu no klasifikasaun;
- b) Prepara, liuhosi koordenasuan ho Diresaun Nasionál Administrasaun no Finansa, proposta kona-ba orsamentu no planu-asaun-anuál no akompaña ninia ezelesaun, hodi hato'ó alterasaun ne'ebé presiza;
- c) Prepara planu ba jestaun finanseira, lojística no pesoál;
- d) Prepara rekizisaun ba fundu dotasaun orsamentál;
- e) Jere rekursu no meu-finanseiru ne'ebé DNSPRS iha, hodi aseguara prosedimentu administrative ne'ebé presiza;
- f) Elabora no lehat minuta-kontratu nian, akordu, protokolu ka aktu-jestaun ka administrasaun sasá de'it ne'ebé husu;
- g) Halibur, organiza no atualiza hela de'it informasaun kona-ba rekursu umanu;
- h) Supervizona atividade administrasaun nian kona-ba pesoál ne'ebé integra ba DNSPRS no halo tuir rejistu asiduidade no antiguidade pesoál nian;
- i) Organiza no instrui prosesu hirak ne'ebé haree ba pesoál nia situasaun profesionál no hametin prosedimentu administrasaun ne'ebé presiza, liuhosi koordenasaun ho Diresaun Nasionál Administrasaun no Finansa;
- j) Halo no aseguara arkivu ba dokumentu hotu-hotu ho suporte informátiku;

- k) Prepara projetu resposta nian ba rekursu kontensiozu-administrativu no organiza prosesu administrasaun kona-ba rekursu ne'ebé hetan ona intervensaun;
- l) Tau-matan ba funksionamentu sistema nian no ekipamentu informátiku;
- m) Asegura distribuisaun ba rekursu no ekipamentu iha DNSPRS;
- n) Organiza prosedimentu no atividade lojística DNSPRS nian;
- o) Ezerse tan kompeténsia hirak ne'ebé lei fó ka Diretór Nasionál delega;

KAPÍTULU III

ESTABELESIMENTU PRISIONÁL NO SENTRU JUVENIL

SEKSAUN I

DIRESAUN

Artigu 15º

Estabelesimentu Prizionál no Sentru Juvenil nia Diresaun

1. Diretór ida maka lidera estabelesimentu prizionál ka sentru juvenil, ho dependénsia direta ba Diretór Nasionál DNSPRS;
2. Kargu diretór ba Estabelesimentu Prizionál ka Sentru Juvenil maihosi hahilik ne'ebé liuhosi despaxu Ministru Justisa nian, tuir Diretór Nasionál DNSPRS nia proposta, ne'ebé hanesan, ba kargu Diretór Nasionál, liuliu efeitu remuneratóriu.

3. Diretor Estabelesimentu Prizionál ka Sentru Juvenil bele apresenta xefe-servisu ba Diretor Nasionál hodi troka nia bainhira la tama servisu ka hetan impedimentu;

Artigu 16º

Diretor Estabelesimentu Prizionál no Sentru Juvenil nia kompeténsia

Diretor Estabelesimentu Prizionál no Sentru Juvenil iha kbiit atu:

- a) Representa Estabelesimentu Prizionál ka Sentru Juvenil;
- b) Fahe pesoál sira ba servisu oioin;
- c) Orienta no koordena servisu iha Estabelesimentu Prizionál ka Sentru Juvenil;
- d) Fó instrusaun no orden servisu nian ba funcionáriu no guarda-prizionál;
- e) Hala'ó poder dixiplinár ne'ebé fó ba nia tuir lei;
- f) Garante atu kumpre lei no norma hirak kona-ba ezekusaun pena no direitu nomós devér ema-dadur nian, bainhira kumpre hela pena;
- g) Ezerse tan kompeténsia hirak ne'ebé lei fó ka Diretor Nasionál delega;

SEKSAUN II

SERVISU

Artigu 17º

Estabelesimentu Prizionál no Sentru Juvenil nia servisu

1. Estabelesimentu Prizionál no Sentru Juvenil nu'udar servisu operasionál no la operasionál.
2. Servisu operasionál hala'ó atividade vijilánsia, lojística, rezidénsia, saúde, formasaun no ensinu.
3. Servisu la operasionál hala'ó atividade kona-ba rekursu umanu, administrasaun, finansa no jestaun ba instalasaun no ekipamentu.
4. Seksaun hirak ne'ebé iha Estabelesimentu Prizionál no Sentru Juvenil dezenvolve ninia atividade liuhosi kolaborasaun estreita ho servisu sentrál, tuir Departamentu DNSPRS ida-idak nia kompeténsia rasik;
5. Regra ne'ebé define funcionamentu seksaun estabelesimentu prizionál no sentru juvenil hatuur iha Regulamentu Jerál Estabelesimentu Prizionál, tuir lei;

Artigu 18º

Servisu operasionál

Servisu operasionál iha kbiit atu:

- a) Hametin seguransa iha Estabelesimentu Prizionál no Sentru Juvenil no hala'ó vijilánsia ne'ebé presiza ba ema-dadur ne'ebé iha fatin ne'ebá;

- b) Halo kolaborasaun ho Departamentu Seguransa no Ezekusaun Penál hodi organiza no fó eskolta ba emadadur bainhira sai ba li'ur;
- c) Elabora relatóriu ka fó-sai paresér kona-ba servisu seguransa iha Estabelesimentu Prizionál no Sentru Juvenil, bainhira husu;
- d) Organiza no atualiza hela de'it fixeiru, arkivu no prosesu individuál ema-dadur nian;
- e) Haburas atividade hirak ne'ebé presiza atu simu ema-dadur, hodi esplika kle'an regulamentu no norma ne'ebé la'ó hela iha Estabelesimentu Prizionál ka Sentru Juvenil;
- f) Organiza no atualiza afektasaun ba ema-dadur iha bloku rasik;
- g) Simu no haruka korrespondénsia ema-dadur nian;
- h) Fó-hatene prosesu hirak kona-ba ema-dadur nia situasaun, liuliu autorizasaun atu halo transferénsia, saída no ospitalizasaun;
- i) Kolabora ho DNSPRS nia Departamentu no entidade parseira seluktan hodi elabora no hala'ó programa no projetu hirak ne'ebé haree ba individualizasaun pena no reinsersaun sosiál, tuir ámbitu prizaun nian;
- j) Garante fatin ne'ebé di'ak atu hala'ó entrevista, vizita, kursu profisionál, aula alfabetizasaun no edukasaun kontínua, hanesan mós atendimentu ba área saúde no atividade seluktan ne'ebé fó hosi ema profisionál ba programa akompañamentu ema-dadur no reinsersaun sosiál;
- k) Halo tulun-lisuk ho Departamentu Reinsersaun Sosiál no Observasaun Kriminolójika no entidade parseira seluktan hodi

organiza kursu eskolár ba grau ensinu la hanesan no fahe ema-dadur ba atividade profisionál ne'ebé kona loos ba ninia aptidaun;

l) Apresenta adopsaun ba medida ne'ebé hadi'ak prestasaun servisu saúde no kondisaun ijiéniku-sanitáriu servisu nian, hanesan mós, implementa medida rastreiu no prevene moras infekto-kontajioza ba ema-dadur, hamutuk ho Departamentu Reinsersaun Sosiál no Observasaun Kriminolójika no entidade parseira seluktan;

m) Promove no kolabora liuhosi asaun formasaun no atualizasaun tékniku-sientífika ho ema profisionál ne'ebé servisu iha Estabelesimentu Prizionál ka Sentru Juvenil;

n) Organiza atividade ba kultura, rekreativa no edukasaun fízika, ho ema-dadur nia partisipasaun;

o) Fahe hela de'it informasaun ba ema-dadur, liuliu akontesimentu hirak ne'ebé kona comunidade, dezenvolve kapasidade lee jornál loron-loron no publikasaun seluk;

p) Organiza no jere biblioteca ba ema-dadur uza;

q) Ezerse tan kompeténsia hirak ne'ebé lei fó ka delega hosi diretór Estabelesimentu Prizionál ka Sentru Juvenil.

Artigu 19º

Servisu la operasionál

Servisu la operasionál iha kbiit atu:

a) Elabora planu anuál ba atividade Estabelesimentu Prizionál no Sentru Juvenil, hanesan mós relatóriu ezekusaun;

- b) Fó-sai orientasaun ba servisu hotu-hotu atu elabora planu sektoriál;
- c) Organiza espediente hotu-hotu sekretaria nian, hodi hametin resepsaun, halo rejistu no fó klasifikasaun;
- d) Fó apoiu administrativu no lojístiku hodi halo armazenajen, konservasaun no distribuisaun ba soin hirak ne'ebé servisu hetan;
- e) Asegura ezekusaun ba espediente hotu-hotu ne'ebé relasiona ho servisu oiain;
- f) Ezekuta orsamentu ne'ebé destina ba Estabelesimentu Prizionál ka Sentru Juvenil no hato'o presiza atu muda;
- g) Jere meiu-finanseiru ne'ebé Estabelesimentu Prizionál ka Sentru Juvenil iha;
- h) Realiza no asegura prosedimentu administrativu hosi prosesu finansiamentu no lojístiku Estabelesimentu Prizionál nian ka Sentru Juvenil;
- i) Halo jestaun ba imóveis, veíkulu, makinária no ekipamentu;
- j) Halo organizasaun, manutensaun no fiskalizasaun ba armazein no ofisina ka atividade hirak seluk Estabelesimentu Prizionál nian ka Sentru Juvenil;
- k) Realiza akizisaun ne'ebé presiza ba Estabelesimentu Prizionál ka Sentru Juvenil nia funksionamentu, tuir Orsamentu Jerál Estadu;
- l) Halo eskriturasaun, rejistu kontabilístiku obrigatóriu no prosesa dokumentu despeza nian;

m) Ezersa tan kompeténsia hirak ne'ebé lei fó ka delega hosi direktór Estabelesimentu Prizionál ka Sentru Juvenil.

KAPÍTULU IV

PESOÁL

Artigu 20º

Rejime jurídiku ba kuadru pesoál

1. Rejime jurídiku ba kuadru pesoál DNSPRS maka tau iha diploma ida-ne'e no lejizlasaun aplikavel ba funksionáriu no ajente administrasaun públika.
2. Estatutu Guarda-Prizionál maka regula pesoál ba vijilánsia, seguransa, tékniku no administrasaun hodi hala'o knaar ba servisu hirak ne'ebé iha Estabelesimentu Prizionál ka Sentru Juvenil.

Artigu 21º

Alterasun ba kuadru pesoál

1. Kuadru pesoál elabora tinan-tinan, tuir termu lejizlasaun ne'ebé la'o hela ho kbiit legál.
2. Diploma ministeriál hamutuk ho Ministru Justisa no Ministru Finansa maka halo alterasaun ba kuadru pesoál, tuir proposta hosi Direktór Nasionál, liuhosi Komisaun Funsun públika nia paresér.

Artigu 22º

Ekupa projetu

1. Bele harii ekupa projetu hodi hala'õ misaun interdixiplinár, ne'ebé Diretór Nasionál sai nu'udar responsavel ba projetu.
2. Bainhira ekupa projetu harii ho elementu hosi servisu la hanesan, Diretór Nasionál iha kbiit, liuhosi Ministru Justisa nia autorizasaun, harii ekupa projetu ne'ebé halo koordinasaun ho Diretór Nasionál sira hosi Diresaun seluk Ministério da Justiça nian.
3. Bainhira lori funsaun iha ekupa projetu ida, la fó direitu atu aumeta remuneratóriu.

Artigu 23º

Estájiu

1. DNSPRS bele hala'õ estájiu ba estudante hosi estabesimentu ka instituisaun ensinu ne'ebé halo tiha protokolu.
2. Diretór Nasionál maka define número vaga, durasaun período estájiu nian no servisu ne'ebé admite tiha, haree hosi presiza servisu nian.
3. La selu estájiu ne'ebá fó ba estudante no hetan karatér komplementár ba kursu be instituisaun ensinu fó, ho objetivu tulun formasaun profisionál liuhosi kontaktu ho atividade ne'ebé DNSPRS hala'õ tiha, hodi la hamoris ligasaun iha DNSPRS no estajiáriu nia leet.

KAPÍTULU V

JESTAUN FINANSEIRA

Artigu 24º

Instrumentu ba jestaun

Hala'ok hodi dezenvolve DNSPRS nia kompeténsia hatuur iha jestaun objetivu nian, kontrolu orsamentu ne'ebé loos, dixiplina ba instrumentu hirak tuirmai:

- a) Planu anuál, asaun plurianuál, ne'ebé tau ho atividade prinsipál be sei haburas no hatuur objetivu ne'ebé bele tetu-sukat;
- b) Orsamentu anuál;
- c) Relatóriu trimestrá, anuál atividade nian;
- d) Relatóriu finanseiru periódiku, fulan no tinan.

Artigu 25º

Reseita

DNSPRS nia reseita maka dotasaun ne'ebé fó tiha ba nia hosi orsamentu Estadu, hanesan mós hirak seluk ne'ebé lei fó.

KAPÍTULU VI

DISPOZISAUN FINÁL NO TRANZITÓRIA

Artigu 26º

Destakamentu, rekizisaun, komisaun ba servisu no hirak seluk

1. Pesoál ne'ebé hala'ó servisu, to'ó data aprovasaun diploma ida-ne'e, iha DNSPRS tuir rejime destakamentu, rekizisaun ka situasaun seluk ne'ebé hanesan, hela nafatin iha rejime ne'ebé hanesan.
2. Diretór Nasionál bele autoriza halo destakamentu ka rekizisaun ba funcionáriu, bainhira de'it prezisa, atu hala'ó knaar iha servisu seluk, tuir ninia tutela.

Artigu 27º

Regulamentasaun

Diploma ministérial hosi Ministru Justisa no membru Governu ne'ebé responsabiliza ba Finansa no Administrasaun Públika maka aprova hala'ok hodi harii no organiza pesoál ba subunidade orgánika Departamentu nian.

Artigu 28º

Revogasaun

Revoga tiha diploma ministeriál nº 33/2009, 17 Abril.

Artigu 29º

Hala'ó knaar ho kbiit legal

Diploma ida-ne'e hala'ó knaar ho kbiit legál hafoin loron tatuir ninia publikasaun.

Ministru Justisa aprova iha 14/06/2013.

Ministru Justisa

Dionísio Babo Soares

Jornal da República publika iha 19/06/2013.